



LE GOUVERNEMENT  
DU GRAND-DUCHÉ DE LUXEMBOURG  
Ministère d'État

**Gemeinsam Äntwert vum Premierminister, Staatsminister, vun der Ministesch fir Famill an Integratioun, vum Wirtschaftsminister, vum Minister fir Mëttelstand a vum Minister fir Tourismus op d'parlamentaresch Fro n° 5218 vum 12. November 2021 vun dem honorabelen Deputéierte Fred KEUP iwwert d'Internetsite vun der Regierung.**

Mat hirer Strategie fir d'Promotioun vun der Lëtzebuenger Sprooch wëllt d'Regierung hiert Engagement fir d'Sprooch nach eng Kéier verstärken an d'Wichtigkeet vun der Lëtzebuenger Sprooch als Kommunikatiouns-, Integratiouns- a literaresch Sprooch ënnersträichen.

Och d'Méisproochegkeet ass eng Charakteristik vu Lëtzebuerg. Mat der Promotioun vum Lëtzebuergesch gëtt sech och gläichzäiteg fir d'Promotioun vun der Méisproochegkeet engagéiert.

Franséisch ass eng vun den 3 wichtigste gesetzleche Verwaltungssproochen. Dofir ginn d'Internetsite vun de Ministère an de staatleche Servicer alleguer ënnert anerem op Franséisch ugebueden. Donieft huet d'Lëtzebuergesch schon of ville staatlechen Internetsäiten eng fest Plaz kritt, 22 vun den 24 Internetsite vu Ministère sinn och schon op Lëtzebuergesch disponibel.

Den Internetsite vum Wirtschaftsministère ass den Ament nach net op Lëtzebuergesch disponibel. Och während der Covid-19 Pandemie sinn déi spezifesche Contenuen an en Q&A op Franséisch, Däitsch an Englesch disponibel gemaach gi fir d'Betriber iwwer déi spezifesche Reglementatiounen während der Krise z'informéieren. Dat sinn allgemeng déi dräi Sproochen, déi an der Geschäftswelt am allgemenge Kontext vun den administrative Bestëmmunge fir Betriber an hir Salariee mat hirem dacks komplexe juristeschen an technesche Vocabulaire eng wichteg Roll spillen.

Zum Gebrauch vun der Lëtzebuenger Sprooch am Wirtschaftsministère sief bemierkt dass d'Pressekonferenze prioritär op Lëtzebuergesch ofgehale ginn an de Stelleväert vun der Lëtzebuenger Sprooch déi néideg Unerkennung kritt. All Kéiers wann d'Zesummesetzung vum Public an och de Kontext vum Evenement et erlaben, dann halen de Wirtschaftsminister an de Mëttelstand- an Tourismusminister hier Rieden op Lëtzebuergesch.

Den Internetsite vum Familljeministère proposéiert säi ganzen Inhalt an dräi Sproochen (Franséisch, Däitsch, Englesch). Domadden entsprécht en och engem vun de wichtigsten Accessibilitéitscritèren, nämlech d'Informatioun engem esou breede Public wéi méiglech zur Verfügung ze stellen. D'Accessibilitéit ass eng Prioritéit am Hibleck op d'Attributiounen vum

Familljeministère - Handicap, eeler Leit an Integratioun - wou speziell Adaptatioune gebraucht ginn.

Lëtzebuenger Résidente mat sensoriellen a mentalen Aschränkungen gi ganz oft däitschsproocheg scolariséiert a begleet a siche gezielt no däitschen Inhalter. Dei däitsch, an an aanerem Mooss, och di franséisch an englesch Versiounen, garantéieren ausserdeem d'Veerarbeitung duerch Assistenztechnologien wéi zum Beispill Screenreadere, fir déi leider nach keng lëtzebuergesch Ausféierungen zur Verfügung stinn. Och „Leichte Sprache“ a Gebärdesprooch, déi en Deel vun de spezifeschen Inhalter ausmaachen, sinn op Lëtzebuergesch nët verfügbar. Trotzdem wäerten natierlech d'Haaptrubrike vum Site méttelfristeg och op Lëtzebuergesch disponibel sinn.

Lëtzebuerg, den 10. Dezember 2021

De Premierminister, Staatsminister

(s.) Xavier BETTEL